



**KEMENTERIAN PEMBANGUNAN  
USAHAWAN DAN KOPERASI**  
Ministry of Entrepreneur Development and Cooperatives

## **KENYATAAN MEDIA MENTERI PEMBANGUNAN USAHAWAN DAN KOPERASI**

### **PROGRAM KENALI KOPERASI**

---

**PUTRAJAYA, 8 SEPTEMBER 2020** - Kementerian Pembangunan Usahawan dan Koperasi (MEDAC) telah menganjurkan program Kenali Koperasi pada 8 September 2020 bertempat di Auditorium Cempaka Sari, Kompleks Perbadanan Putrajaya, Presint 3, Putrajaya.

Program Kenali Koperasi merupakan program pendedahan awal kepada warga Kementerian dan agensi di bawah Kementerian Pembangunan Usahawan dan Koperasi (MEDAC) mengenai asas keusahawanan koperasi dan tatacara yang terlibat dalam penubuhan sesebuah koperasi. Program ini juga menjadi platform untuk koperasi-koperasi yang berada dalam kedudukan yang terbaik seperti Bank Kerjasama Rakyat Malaysia Berhad (Bank Rakyat), Koperasi Kakitangan Petronas Berhad (KOPETRO) dan Koperasi Profesional Putrajaya Berhad (KOPROJAYA) untuk berkongsi kejayaan berkoperasi. Program seumpama ini sangat penting dalam memastikan penubuhan sesebuah koperasi yang lebih berdaya maju dan berdaya saing.

Selain itu antara aktiviti yang dijalankan bersempena program Kenali Koperasi adalah Bazar Jualan Harga Patut yang bertujuan untuk membantu rakyat bagi mengurangkan kos sara hidup, mempromosi dan meningkatkan jualan produk koperasi dengan menawarkan barangan keperluan asas dengan harga yang lebih murah serta memupuk nilai-nilai keusahawanan selain semangat berkoperasi.

Bersempena majlis perasmian program tersebut, saya juga telah mengumumkan penubuhan 'Koperasi Kementerian Pembangunan Usahawan dan Koperasi Berhad' yang dilihat antara agenda yang menyokong pernyataan misi MEDAC untuk mewujudkan ekosistem koperasi yang holistik dan kondusif dalam menyokong agenda pembangunan keusahawanan negara yang inklusif, seimbang dan mampan.

Program sehari tersebut diakhiri dengan Mesyuarat Agong Permulaan Koperasi MEDAC Berhad dan perlantikan Ahli Lembaga Koperasi yang akan menerajui koperasi tersebut.

**DATO SRI DR. HAJI WAN JUNAIDI TUANKU JAAFAR**  
**MENTERI PEMBANGUNAN USAHAWAN DAN KOPERASI**